

1 Jo-Korintho

JANDIKO: Jaote Paulo

KAR NDIKO: Efeso

KINDE NDIKO: 56 E YIK RUOTH(AD)

Gik Manie Iye

Paulo nosechako kanisa e dala maduong' mar Jo-Yunane miluongoni Korintho kane en e wuodhe mar Injili tero mar ariyo(Tich joote 18:1-8,) to bang' wuokne kanyo noyudo wach ni weche neok beyo. Mae nochune ndikonegi baruwa kaluwore gi chandruok mang'eny mane gin godo. Jogi neok oyie gi chunygi ni Paulo ne en jaote adier, neok gimio mesa mar Ruoth luor, ne gichandore kuom chamo ring'o mane oyang'ne liswa, ne gidonjone jowete-gi e kar yalo bura, ne ok gikwedo timbe mochido, ne ok giyie ni chier nitie kendo ne gichandore e weche mag kend, to magi gin mana matin kuom chandruok mang'eny mane gin godo. Paulo noneno ni nyaka nondiki kuom wechegi kapok jo- Kristo man Korintho opogore mogore piny. E kinde ma Paulo puonjo kuom chandruokgi omedo puonjo matut ahinya kuom weche mag yie.

THORRO

Gima duong' momiyo Paulo nondiko baruwani en ni nodwaro mondo osiem Jo-Kristo man Korintho e timbe moko manono mane nitie e diergi konyisogi ber mar dak makare kaka Jo-Kristo. Ok oromo mondo waluongre ni wan Jo-Kristo, to nyaka watim gik moko kaka jo-Kristo. Tamruok timo mano en njawo nying Kristo. Paulo medo puonjo kaka Kristo ema oromo chutho e weche duto ne ng'atno moyie. Kuom Kristo oketwa maler, opwodhwa kendo orwakwa e nyim Nyasaye (1:30)

WECHE MOCHAN KAE GIN;

1. Mos mar Paulo 1:1-9
2. Chandruok mar pogruek 1:10-4:21
3. Chandruok mar timbe gath 5:1-13
4. Chandruok mar tero wadu eod bura 6:1-11
5. Chandruok mar timbe chode 6:12-20
6. Chandruok eweche mag kend 7:1-40
7. Chandruok kuom lamo nyiseche 8:1-1:11
8. Chandruok kuom lemo 11:2-14:40
9. Chandruok kuom chier 15:1-58
10. Weche mogik 16:1-24

1 An Paulo, moluongi mondo obed jaote mar Kristo Yesu kaluwore gi dware mar Nyasaye kaachiel kod owadwa Sostheno. ²Wandikonu un Kanisa mar Nyasaye man Korintho, ma un joma osep-wodhi ei Kristo Yesu, kendo moseluongi mondo obed joma ler kaachiel gi ji duto

mamoko man kamoro amora maluongo nying Ruodhwa Yesu Kristo, ma en Ruodhgi kendo Ruodhwa:

³Ng'wono gi kuwe moa kuom Nyasaye Wuonwa kod Ruoth Yesu Kristo obed kodu.

Dwoko Erokamano

⁴Adwoko ni Nyasacha erokamano kinde duto kuomu, nikech ng'wonone mosemiyou kuom Kristo Yesu. ⁵Nimar kuome usebedo momew e yore duto kaka wuoyo duto kod ng'eyo duto, ⁶nikech nendwa kuom Kristo nosir e dieru. ⁷Kuom mano ok uremo mich moro amora mar Roho kuritogo odiechieng' ma Ruodhwa Yesu Kristo nofwenyree. ⁸En bende obiro ritou mondo ubed motegno nyaka giko, kuonge bura chieng' mar Ruodhwa Yesu Kristo. ⁹Nyasaye moseluongou mondo ubedie lalruok gi Wuode Yesu Kristo Ruodhwa en jaadiera.

Pogruok Ei Kanisa.

¹⁰Asayou e nying Ruodhwa Yesu Kristo, Jowetena, mondo un duto uwinjru ng'ato gi ng'ato. Kik pogruok moro amora bedi e kindu, to beduru kuriworu maok pogu, ka un gi dwaro kod paro machalre. ¹¹Jowetena, jood Kloe moko osekelona wach ni nitie dhawo e dieru. ¹²Tiend gima awacho chal kama: Ng'at moro kuomu wacho ni, "An jakor Paulo;" to ng'at machielo to wacho ni, "An jakor Apolo;" machielo bende oramo ni, "Ajakor Kefa;" to moro to ni, "Ajakor Kristo."

¹³Kristo opogore e sidienje koso? Paulo be nogur e msalaba nikech un? Koso nuyudo batiso e nying Paulo? ¹⁴Adwoko erokamano ni ne ok abatiso ng'ato kuomu kata achiel makmana Krispo gi Gayo, ¹⁵omiyo ng'ato ok nyal wacho ni nuyudo batiso e nyinga. ¹⁶(Ee, jood Stefano bende ne abatiso, to ok apar ni nabatiso ng'at machielo mokalo mano.) ¹⁷Nikech Kristo ne ok oora mondo abatis ji, to noora mondo ayal Injili, ok gi weche mamit mag riekio dhano, nono to dipo ka msalap Kristo oma tekone.

Kristo En Riekio Gi Teko Nyasaye

¹⁸Nikech wach msalaba en fuwo ni joma lal, to ni wan joma iwaro, en teko Nyasaye. ¹⁹Nikech ondiki ni,

Abiro ketho riekio joma riek; kendo

ng'eyo mar joma ong'eyo abiro keyo nono."

²⁰Ere ng'ama jariekio? Ere ng'at mosomo molooyo ji? Ere jatwak molony molooyo e pinyini? Donge Nyasaye osemiyo riekio mar pinyini odoko fuwo? ²¹Nikech Nyasaye nochano gi riekone ni piny ok nyal ng'eyo Kristo gi riekone owuon, to nochano mana ni kuom fuwo mar wach mwalando ema owargo joma oyie. ²²Jo-Yahudi dwaro ni nyaka timnigi honni, to Jo-Grik to manyo riekio, ²³to wan wayalo Kristo ma nogur, ma en kidi machwanyo jo Yahudi kendo fuwo ni Ogendini. ²⁴To kuom ji duto ma Nyasaye oseluongo, bed ni gin jo Yahudi kata jo Grik, Kristo en teko Nyasaye kendo en riekio Nyasaye. ²⁵Nikech fup Nyasaye riek molooyo riekio dhano, kendo nyawo mare otegnio molooyo teko dhano.

²⁶Jowetena, parieuru kaka nuchal kane Nyasaye oluongou. Ji mathoth kuomu ne ok joma riek, kipimou gi riekio dhano, bende ji mathoth kuomu ne ok joma rahu-ma kata joma oa e koth ruodhi. ²⁷To Nyasaye noyiero gima ofuwo mag piny mondo okuodgo wi joma riek. Nyasaye noyiero bende gik manyap mag piny mondo okuodgo wi joma rateke. ²⁸Nyasaye noyiero gik ma piny ochayo kendo manono mondo ong'ad oko gik ma jopiny kwano ni lich. ²⁹Notimo kamano mondo kik ng'ato osungre e nyime. ³⁰En e chakruok mar ngimau ei Kristo Yesu, mane obedonwa riekio moa kuom Nyasaye, tiende ni tim makare gi pwodhruok, kod resruok, ³¹Emomiyo mana kaka ondiki ni, "ng'ama sungore osungre mana ei Ruoth."

2 Kuom mano Jowetena, kane abiro iru tone ok abiro gi weche mamit kata gi riekio kayalonu matut wach maling' ling' mar Nyasaye. ²Nikech nang'ado wach e chunya ni kik ang'e gimoro amora machielo mak mana Yesu Kristo kod gur mare. ³Ne abiro iru gi nyawo kod luoro, kendo ka denda duto tetni. ⁴Kane awuoyo

kodu kendo ayalonu, to ne ok akonyora gi weche mamit kata mariek, to ne en kuom nyisruok mar teko mar Roho⁵ mondo yieu kik gurre kuom rieko dhano, to ogurre mana kuom teko Nyasaye.

Rieko Moa Kuom Roho

⁶To wayalo rieko ni joma otegn, to ok rieko mar ndalogi, kata mag ruodhi mandalogi, mabiro lal nono ⁷Ooyo, wawuoyo kuom rieko mopondo mar Nyasaye, ma en rieko mosebedo kopandi kendo mane Nyasaye oikonwa nyaka aa chakruok piny mondo wayud duong'. ⁸Jotend pinyini kata achiel ok nowinjo tiend rieko mwayaloni, nikech ka dine giwinje to ok dine giguro Ruodh Duong'. ⁹To en mana kaka ondiki ni,

"Onge wang' moseneno, kata it mosewinjo, onge chuny moserwako gima Nyasaye oseiko ni joma ohere."

¹⁰Wan to Nyasaye oseelonwa tiend wachne mopondo kuom teko mar Rohone, Roho elo gik moko duto, koda ka weche matut mag Nyasaye. ¹¹Koso nitie ng'ato manyalo ng'eyo pach ng'at machielo? Donge chuny ng'ato owuon ema ong'eyo gima ni eiye? Kamano bende e kaka onge ng'at mong'eyo pach Nyasaye makmana Roho mar Nyasaye. ¹²Roho mwaseyudo ok en roho mar piny, to en Roho moa kuom Nyasaye, mamiyo wang'eyo mich ma Nyasaye osemiyo. ¹³Mago e weche mwawuoyo kuomgi, ka ok wakonyre gi weche mopuonjwa gi rieko dhano, to wakonyore gi weche ma Roho ema opuonjo, kwalero adiera mag chuny gi weche mag chuny. ¹⁴To ng'at ringruok ok nyal rwako gik moa kuom Roho mar Nyasaye, nikech onenogi kaka fuwo kendo ok onyal winjo tiendgi, nikech iwinjogi kuom roho. ¹⁵Ng'at man gi roho to nono gik moko duto, to en to onge ng'ama none.

¹⁶"Koso en ng'a mong'eyo pach Ruoth ma ding'adne rieko?"

Wan to wan-gi pach Kristo.

Wach Kuom Pogruok E Kanisa

3 Jowetena, ne ok anyal loso kodu kaka joma nigi roho, to mana kaka jopiny mapod mana nyithindo mayom kuom Kristo. ²Napidhou gi chak to ok gi chiemo motegno nikech ne pok ubedo moikore ni chiemo motegno. Kata sani pok uikorune. ³Pod un mana jopiny. Nikech ka nyiego kod dhawo nie kindu to donge mano nyiso ni un jo piny kendo utimo timbe machalre gi timbe mag dhano. ⁴Nikech ka ng'ato wacho ni, "An jakor Paulo, " to ng'at machielo to oramo ni, "An jakor Apolo," donge koro un ji ajia?

⁵Uparo ni Apolono to ang'o? Koso Paulo to en ang'o? Gin mana jotich ma nomiyo uyie mana kaka Ruoth nomiyo ng'ato ka ng'ato tichne mondo otim. ⁶An ne akomo, to Apolo noolo pi to Nyasaye ema nomiyo gidongo. ⁷Omiyo ng'at mokomo kata ng'at moolo pi ok en gimoro, makmana Nyasaye, momiyo gik moko odongo. ⁸Jakomo gi jaool pi jonigi thorro machalre, kendo ng'ato ka ng'ato kuomgi noyud pokne kaluwore gi tichne. ⁹Nikech waduto wan jotich Nyasaye, matiyo kaachiel to un puoth Nyasaye, kendo od Nyasaye.

¹⁰Kuom ng'wono ma Nyasaye osemiyo, ne agero mise kaka jagedo mong'ith, kendo koro ng'at machielo gedo e miseno. To ng'ato ka ng'ato nyaka ged kotang'. ¹¹Nikech onge ng'ama nyalo keto mise machielo mopogore gi mano moseketi, ma en Yesu Kristo. ¹²Ka ng'ato ogedo e miseni lotiyo gi dhahabu kata gi fedha kata gi kite ma nengogi tek; kata gi bao, kata gi lum, kata gi odundu, ¹³to tich jagedo ka jagedo nonenre kaka chal, nikech Odiechieng Ng'ado Bura nonyis tichne e lela. Nofweny chal tich ng'ato ka ng'ato gi mach, nikech mach ema notemgo chal mar tich ng'ato. ¹⁴Ka gima ogero notony mak owang' e mach, to noyud michne. ¹⁵To ka tich ng'ato owang' e mach to no dhi asara. En owuon to norese, to norese mana ka ng'at matony aa e mach maliel.

¹⁶Donge ung'eyo ni un uwegi un

hekalu mar Nyasaye, kendo ni Roho mar Nyasaye odak e iu? ¹⁷Ka ng'ato oketho hekalu mar Nyasaye to Nyasaye biro kethe, nikech hekalu mar Nyasaye oler, to un e hekaluno.

¹⁸Kik uwuondru kendu. Ka ng'ato kuomu paro ni oriek, e tiengni, to onego olokre ng'ama "ofuwo" mondo eka odok mariek. ¹⁹Nikech riekro mar pinyini en fuwo e nyim Nyasaye. Nikech ondiki ni, "Omako jorieko gi riekogi giwegi," ²⁰to bende ondiki ni, "Ruoth ong'eyo pach joma riek ni onge tich." ²¹Kuom mano, kik ng'ato sungre nikech dhano! Nikech gik moko duto gin mau. ²²Kata obed Paulo kata Apolo kata Kefa kata piny kata ngima kata tho kata ndalugi kata ndalo mabiro. Giduto gin mau, ²³un to un mag Kristo, to Kristo en mar Nyasaye.

Joote Mag Kristo

4 Kuom mano ji onego okawwa kaka jotich Kristo, kendo kaka jorit weche mopondo mag Nyasaye. ²To ong'ere ni joma omi tich mar rito nyaka bed jo adiera. ³An awuon ok lichna ka uyala kata ka oyala e od bura moro amora mar dhano. Chutho kata an ok ayalra kenda. ⁴Chunya nikare, kendo ok onyisa ni bura oloya, to mano ok nyis ni aonge ketho. To Ruoth ema ng'ado na bura. ⁵Kuom mano kik ung'ad bura ka pok kinde ochopo, to rituru mondi nyaka Ruoth bi. En owuon noel e lela gik masani opondo e mudho, kendo enonyis paro duto mopondo e chuny dhano. E kindeno ema ng'ato ka ng'ato noyud pak moa kuom Nyasaye.

⁶Koro, Jowetena, aseloso ka akonyora gi nyinga kod nying Apolo mondo ukonyru, kupuonjoru kuomwa tiend wach mawacho ni, "Kik ukal weche mondiki," Mano biro miyo ok udhial ng'ato moloyo nyawadgi. ⁷Nikech en ng'a momiyo iparo ni iber moloyo ng'at machielo? Ang'o ma in-go mane ok omiyi? To ka gima in-gono nomiyo to ang'o momiyo isungori mana kagima ne ok omiyigo?

⁸Un ero un-gi gik moko duto mudwaro! Ero usedoko jomwandu! Usebedo ruodhi, kendo udak kata waonge! Mano kaka agombo ni ne ubed ruodhi adier mondo wan bende wabed ruodhi kaachiel kodu! ⁹Nikech nenorena ni Nyasaye oseketowa joote mawuotho bang'ji, mana kaka joma oseng'adnigi buch tho mondo onegi e dier pap. Osemi wabedo joma piny duto rango: joma lichne malaikie kaachiel gi ji. ¹⁰Wan wafuwo nikech Kristo, to un to uriek ndi ei Kristo! Wan wanyap, to un to uroteke! Un imiyou duong' to wan ochawa! ¹¹Kata sani kech chamowa kendo riyo oloyowa. Warwako lewni mokidhore okidhore, kendo isandowa malit, ka waonge mier mwadagie. ¹²Watiyo matek gi lwetewa, kendo kokuong'wa to wagwedho joma okuong'owa; kisandowa, to wayie isandowa asanda; ¹³bende ka iyanyowa to wadwoko gi weche mang'won. Nyaka koroni wasedoko machal gi yugi mag piny; wachalo gik mowiti ni onge tich!

¹⁴Ok andiknu wehegi mondo akuodgo wiu, to andikonugi mondo ajiwu, kaka nyithinda mageno ¹⁵Kata obedo ni un-gi ji alufu apar maritou e Kristo, to uonge gi wuone mang'eny, nikech kuom Kristo Yesu, an emane abedo kaka wuonu kane ayalonu Injili. ¹⁶Kuom mano akwayou mondo ulu tinna. ¹⁷Kendo mano emomiyo aoronu Timotheo, ma en wuoda mahero, kendo ma jaadiera ei Ruoth. Obiro paronu kit ngimana ei Kristo Yesu, ma ok opogore gi gik mapuonjo kuonde duto e kanisa ka kanisa.

¹⁸Ero jomoko kuomu sunga omako, mana kagima ok abi biro iru. ¹⁹To abiro biro mapiyo ka Nyasaye oyie, kendo kabiro to nadwar ng'eyo ok mana kaka josungago wuoyo kende, to bende napen-jgi teko ma gin-go. ²⁰Nikech Loch Nyasaye ok otenore mana kuom weche miwacho gidhok, to otenore kuom teko. ²¹Yieruru achiel kuom gik moko ariyogi: Abi iru kating'o boka, koso abi gi hera kod chuny mamuol?

Riemburu Owadwa Materore

5 Wachore e lela ni nitie chode e dieru, kendo ni en kit chode makata jopiny ok tim: Ni ng'ato okawo chi wuon ²To kendo usungoru asunga! Donge onego bed ni upong' gi kuyo mondo ugol ng'at motimo kamano oko mar lalruoku? ³Kata obedo ni aonge kodu kuno e ringruok, to ng'euru ni an kodu kuom chuny. An aseng'ado ni ng'at motimo tim marachno aseng'adone bura, mana kagima an kodu kuno, ⁴Ka uchokoru e nying Ruodhwa Yesu to an kodu kuom chuny, kendo teko mar Ruodhwa Yesu bende ni kodu, ⁵keturu ng'atni e lwet Satan mondo ringre mohero richo okethi, to chunye to mondo oresi chieng' Ruoth.

⁶Sungau ok ber. Donge ung'eyo ni thowi matin kende oromo kuodo mogo modwal duto? ⁷Goluru thowi machonno oko e dieru mondo ubed mogo modwal manyien maonge thowi, mana kaka un gadier. Nikech Kristo, ma en nyarombowa mar Pasaka, osetimgo misango. ⁸Emomiyo koro watimuru sawo, ok gi thowi machon mar himruok kod timbe maricho, to watime gi makati maonge thowi, ma en makati mar wuotho e ler kod adiera.

⁹Ne asendikonu e barupa motelo ni kik ubedi e achiel gi jochode. ¹⁰Ok awuo kuom jopiny mapok oyie ma jochode kata ma jowuoro kata ma jomecho kata malamo nyiseche manono. Mano to dichunwa ni wadar e pinyni. ¹¹To koro andikonu ni mondo kik ubedi e achiel gi ng'ato ang'ata maluongore ni owadu kuom Ruoth, to ochodo, kata ojawuoro, kata olamo nyiseche manono, kata ojaketh nying ji, kata ojamer, kata ojamecho. Ng'at ma kamano kata chiemo kik uchiemgo.

¹²Koso uparo ni nitie gima datim kuom ng'ado bura ni joma pok obedo jo kanisa? Donge joma osedonjo e kanisa ema onego ung'adnigi bura? ¹³Nyasaye biro ng'ado bura ni joma ni oko "Riemburu jarichono oa e dieru."

Joma Oyie Kik Donj Ni Jowetegi Od Bura.

6 Ka ng'ato moro kuomu nigi wach moro gi wadgi, ere kaka doter wachno e nyim joma okia Nyasaye mondo oyal bucheno, kar kelo wachno e nyim jomaler? ²Donge ung'eyo ni jo Maler ema biro yalo piny? Ka un ema onego uyal piny to donge mano nyiso ni unyalo ng'ado bura kuom weche matindo man e kind ji? ³Donge ung'eyo ni wan ema wanayal malaik? Koro gii pinyni to donge wanyalo yalo moyo! ⁴Ka kamano to ang'o momiyo ka un-gi wach e dieru to uyiero jong'ad bura ma jopiny ma kwan-gi onge ei kanisa. ⁵Awacho mano mondo akuodgo wiu. Be dibed ni onge ng'ato e dieru kata achiel mariek manyalo yalo weche man e kind joma oyie? ⁶Kar timo kamano to yudore ni ja Kristo donjo ni ja Kristo wadgi e od bura kendo utimo mano e buch jopiny!

⁷Kaka un-gi buche e kindu kamano nyiso ni un joma oserem chuth. Kar donjo ne wadu e buch jopiny to ok iyie otimni atima marach? Ok iweye owuondi awuonda? ⁸Kar timo kamano to un ema uwuondo joweteu kendo utimonigi marach, kendo utimo kamano mana ni joweteu kuom yie.

⁹Donge ung'eyo ni joma timo timbe maricho ok noyud gwech mar loch Nyasaye? Kik ng'ato wuondu! Ng'euru ni jochode kata joma lamo nyiseche manono, kata joma terore, kata ochode machwo, kata chwo materore gi chwo wetegi, ¹⁰kata jokuoge, kata jowuoro, kata jomer, kata joketh nying ji, kata jomecho, ok noyud gikeni mar Loch Nyasaye. ¹¹Kamano e kaka jomoko kuomu ne chalo. To ne olwoku mi opwodhu, mi oketu udoko joma kare e nying Ruoth Yesu Kristo, kendo kuom Roho mar Nyasachwa.

Richo Mar Chode

¹²Oyiena timo gimoro amora mad-

waro." To gik moko duto ok kelnwa konyruok. Inyalo wacho ni "Oyiena timo gimora amora madwaro", to kik awe gimoro loka misumbane. ¹³"Chiemo en mar ich, to ich en mar chiemo." To Nyasaye biro kethogi duto. Ringruok ok en mar timo chode, to en mar miyo Ruoth duong', mana kaka Ruoth bende en mar ringruok. ¹⁴Nyasaye nochiero Ruoth oa kuom joma otho kendo bende obiro chierowa. ¹⁵Donge ung'eyo ni ringreu gin fuonde Kristo owuon? Be dakaw fuonde Kristo mondo ariwi gi ochot? Mano ok nyal timore ngang'! ¹⁶Koso ukia ni ng'at moriwore gi ochot bedo kode e achiel e ringruok? Nikech owach ni, "Ji ariyogo nodok ringruok achiel." ¹⁷To ng'at moriwore gi Ruoth bedo kode e achiel e chunye.

¹⁸Ringuru utony ni chode. Richo duto ma ng'ato timo otimo oko mar ringre, to ng'at machodo timo richo ni ringre owuon. ¹⁹Donge ung'eyo ni ringreu en hekalu mar Roho Maler modak e iu kendo ma Nyasaye osechiwonu? Ok un mau uwegi; ²⁰nong'iewu gi nengo. Omiyo miuru Nyasaye duong' gi ringreu.

Weche Kend

7 Koro kuom weche mane upenja e barupu, anyalo wacho ni ber mondo ng'ato kik okendi. ²To nikech chode ng'e-ny, ng'ato ka ng'ato nyaka bed gi chiege owuon kendo dhako ka dhako obed gi chwore owuon. ³Dichwo nyaka chop dwach chiege kaka joma okendore, kendo dhako bende nyaka tim kamano ni chwore. ⁴Nikech dhako mokendi onge gi teko kuom ringre owuon, to en mar chwore. Kamano bende, dichwo mokendo onge gi teko kuom ringre owuon, to en mar chiege bende. ⁵Kik utuonru mak mana ka uwinjoru e kindu mar timo mano kuom kinde machwok mondo uchiwru ni lamo. To bang' chiwruok ni lamo, to uchak uriwru kendo mondo kik Satan temu, nikech ok unyal ritoru. ⁶Awacho wachni kaka pacha awuon, to ok kaka

chik. ⁷Dibed maberna moloyo ka ji duto obedo kaka an. To ng'ato ka ng'ato nigi michne ma Nyasaye omiye, ng'at moro ni gi michni, to ng'at machielo bende nigi michne mopogore.

⁸To joma pok okendi gi joma pok okendo, kod mond liete to awachonigi kama. En gima ber moloyo ka gisiko maok gikendo kata okendgi, mana kaka an. ⁹To ka ok ginyal ritore giwigi, to onego gikendi, kata kendni nikech kend ber moloyo ka gombo wang'o ng'ato ka mach.

¹⁰To ni joma osekeno kendo osekeni to achiwonigi chikni (chutho ok an, to Ruoth): Dhako kik were gi chwore. ¹¹To kapo otimo kamano to ochune ni nyaka osik maonge dichwo, to ka ok kamano to odog ir chwore, kendo. Dichwo bende kik riemb chiege.

¹²Ji mamoko duto to akonigi kama (an ema awacho, ok Ruoth): Ni ka owadwa moro ma ja Kristo nigi dhako maok oyie, to oyie dak kode, to kik oriembe. ¹³Bende ka dhako nigi dichwo maok oyie to dichwono oyie dak kode kaka chiege, to kik owege. ¹⁴Nikech dichwo mapok oyie inyalo pwodho nikech chiege, to dhako mapok oyie bende inyalo pwodho nikech chwore moyie. Ka ok kamano to nyithindu dibed mogak, to kaka ong'ere sani, giler.

¹⁵To ka ng'at ma ok oyie ojok noa, to weye aweya odhi. Dichwo moyie kata dhako moyie ok otwe e weche makamago, nikech Nyasaye oseluongowa mondo wadag gi kuwe. ¹⁶Ing'eyo nadi, in dhako, kata inyalo waro chwori? Koso, ing'eyo nadi, in dichwo, ni chiegi inyalo waro nikech in?

¹⁷Kuom mano, ng'ato ka ng'ato kuomu mondo odag ngimano kendo orit gima Ruoth osemyie mane Nyasaye oluongene. ¹⁸Dibed ni ng'ato noluongi koseter nyangu? Kik ogomb ni ne ok otere nyangu. Dibed ni ng'ato noluongi kapok oter nyangu? Ng'at ma kamano kik ter nyangu. ¹⁹Bedo ni ng'ato oter nyangu kata ok oter nyangu ok en gimoro. Gimaduong'

en rito Chike Nyasaye. ²⁰Omiyo ng'ato ka ng'ato mondo obed mana kaka ne en kane Nyasaye oluonge. ²¹Mit ki ne in misumba kane Nyasaye oluongi? Kik mano chandi, makmana ni kapo inyalo yudo yor bedo thuolo to tim kamano moloyo. ²²Nikech ng'at mane Ruoth oluongo ka misumba koro bedo ng'at man thuolo kuom Ruoth, to bende ng'at mane ni thuolo kane Ruoth oluongo doko misumba Kristo. ²³Nong'iewu gi nengo, omiyo kik ubed wasumbini mag'ji. ²⁴Jowetena, ng'ato ka ng'ato nig'i ting' e nyim Nyasaye mondo osik mana kaka Nyasaye noluongo.

²⁵Kuom wach nyiri maok okendi to awacho kama: Aonge gi Chik moa kuomRuoth, to achiwo pacha kaka ng'at ma wechene inyalo geno kuom ng'wono mar Ruoth. ²⁶Nikech chandruok mantie sani, aparo ni ber mondo usik kaka uchal. ²⁷Mitki ng'ato osekendi? Ka kamano to kik idwar mondo uweru gi chwori. Mitki pok ikendo? Kichal kamano to kik imany dhako mondo ikendi. ²⁸To ka ikendo to ok itimo richo; kata ka nyako okendi bende ok otimo richo. To jok mokendo gi mokendi biro neno chandruok mathoth e ngimani, to adwa ni akonyu mondo kik une chandruokni.

²⁹Gima awacho, Jowetena, en ni saa odong' matin. Chakre sani koro joma nig'i mon onego odag kagima giongego; ³⁰joma ywak onego bedi kagima ok giywagi; joma mor onego odag kagima ok gimor; joma ng'iewo gimoro onego odag ka gima gik ma ging'iewogo ok maggi, ³¹joma konyore gi gipiny be kik yie chunygi gedi e gigo. Nikech kaka kit piny obedo sani, okadho piyo.

³²Adwaro ni mondo ubed maonge gi kit parruok duto. Dichwo maok okendo, weche Ruoth ema omako, kaka onyalo siko kotimo gik mamoro Ruoth, ³³to ng'ama osekendo to pache omoko e weche pinyini, kaka onyalo timo gik mamiyo chiege mor. ³⁴Kendo dwarone bende opogore diriyo. Dhako maok okendi, kata nyako ngili, paro kuom weche Ruoth:

Thorrogi maduong' en mondo gibed maler e ringregi gi chunygi. To dhako mokendi to pache ni kuom gipiny, kaka onyalo miyo chwore mor. ³⁵Awacho wechegi mondo uyud konyruok kuomgi, to ok mondo aketnu chik manyaka ulu. Adwaro ni udagi e yo maber, ka chiwruoku ni Ruoth ok opogore.

³⁶Ka ng'ato paro ni ok otimne osiepne manyako mosemakogo keny maber, kendo ka nyakono hike kalo ndalo kendo ka odwaro ni mondo okende, to onego otim gima ohero. Ok otimo richo kotimo kamano. Onego gikendre. ³⁷To dichwo moseng'ado wach e pache owuon, maonge gima ochuno, kendo manyalo chiko dwache, koseng'ado wach chuth ni ok odwa kendo nyakono, en bende otimo maber. ³⁸Kuom mano, ng'at mokendo nyako mangilino timo maber, to ng'at maok okende otimo maber moloyo.

³⁹Chik otweyo dhako gi chwore ndalo duto ma chwore ngima. To ka chwore otho to en thuolo mondo okende gi dichwo moro amora mohero, makmana ni nyaka kende kuom Ruoth. ⁴⁰An to pacha neno ni dhako ma chwore otho nyalo neno maber moloyo ka ok ochak okende kendo, kendo awacho mano ka aparo ni an-gi Roho mar Nyasaye.

Chiemo Motimgo Misango Ni Nyiseche Manono

8 Kuom wach chiemo motimgo misango ni nyiseche manono to awachoe kama: Wang'eyo ni "waduto wan gi riekio. Riekio miyo dhano kawore, to hera to gero ji. ²Ng'at ma kawore ni ong'eyo gimoro kik par ni oseng'eyo moromo kaka dwarore. ³To ng'at mohero Nyasaye to Nyasaye ong'eyo ng'atno.

⁴Koro korka wach chamo chiemo motimgo misango ni nyiseche manono to awachoe kama: Wang'eyo ni nyasaye manono en gima nono e pinyka, kendo wang'eyo ni onge Nyasaye moro makmana achiel. ⁵Nikech kata bed ni gik miluongo ni nyisechego nitie, kata gibed e

polo kata e piny (mana kaka nitie 'nyiseche' kod 'ruodhi' mang'eny),⁶wan to wang'eyo ni nitie Nyasaye achiel kende, ma en Wuoro. En ema gik moko duto oa kuome, kendo momiyo wangima. Bende nitie Ruoth achiel kende ma en Yesu Kristo. En ema nomiyo gik moko duto obetie kendo en ema omiyo wangima.

⁷To ji duto ok ong'eyo wachni. Jomoko pod ong'iyo gi nyiseche manono ma kagichamo chiemo makamano to giparo mana ni en motimnigo nyasaye manono misango; to nikech chunyi gi mar ng'eyo ber gi rach yomyom, gidoko mochido. ⁸To chiemo ok kelwa machiegni gi Nyasaye. Ok wan marach kwachiemu to bende ok wabed maber kwachamogi.

⁹Kata kamano, bed motang' mondo thuolo ma in-go mar chiemo kata mar weyo chiemo kik lokre kidi mar chwanyruok ni joma yomyom. ¹⁰Nikech ka ng'at ma chunye nyap oneni, in miwacho ni in gi riekono, kichiemo e hekalu mar nyiseche manono, donge mano nyalo ywaye mi ocham chiemo motimngo misango ni nyiseche manono? ¹¹Kuom mano owardwani mayomyom ma Kristo notho-neno koro kethore mana nikech riekko miwachogo ni iriek. ¹²Sama itimo richo ni Joweteni e yo makama, kihinyo chunyi gi mayomyom, ng'eni itimo richo ni Kristo. ¹³Kuom mano ka gima achamo miyo owardwa donjo e richo, to abiro weyo chamo ring'o chuth mondo kik ami opodhi.

Ratiro Mag Jaote

9 To donge an thuolo? Donge an jaote? Donge ne aneno Yesu Ruodhwa? Koso donge un olemo mar tichna kuom Ruoth? ²Kata ka jomoko ok okawa kaka jaote, to un owinjore ukawa kamano, nikech un e ranynisi mar bedona jaote kuom Ruoth. ³Ma e kaka apwodhora ka ji koro obedo ng'adona bura kama: ⁴Donge wan gi ratiro mondo omiwa chiemo gi math? ⁵Donge wan gi ratiro mar wuotho gi nyimine majoutewa e wuodhewa mag

Injili kaka joote mamoko, kendo kaka Jowete Ruoth kod Petro johero timo? ⁶Koso an kod Barnaba ema nyaka wati eka wachiem?

⁷En jalueny mane machulo msache kende ka en e lweny? En japur mane ma ok cham olemo mowuok e puothe? Koso jakwath mane makwayo jamni to ok omadhi cha jamnigo? ⁸Koso awuoyo awuoya ka dhano? Donge Chik bende jiwo wachni? ⁹Nikech ondiki e chik Musa ni "Kik itue dho rwath kodiemo cham." Uparoni wach rwedhi ema ne chando chunyi Nyasaye koso? ¹⁰Donge wan ema ne owuoyo kuomwa kowacho wachni? Ee, wachni ne ondikwa, nikech ka japur puro kendo ka jakeyo keyo, to gitimo kamano ka gigeno ni ibiro pogngi cham moko. ¹¹Ka wasepidho kodhi mar chunyi e dieru, to ere rachne ka wakayo kuomu gik mwakonyorego. ¹²Ka joma moko to nigi ratironi mar yudo konyruokgi koa kuomu, donge wan onego wabed gi ratiro makamano molyogi?

Wan ok wasekonyore gi ratironi. Kar timo kamano to wasetuonore yuto mawa mondo kik waket obadho moro amora manyalo geng'o Injili mar Kristo. ¹³Donge ung'eyo ni joma tiyo e hekalu yudo chiembgi koa e hekalu, kendo ni joma chiwo misango e wi altari ipogonigi misango-go? ¹⁴Kamano bende e kaka Nyasaye nochiko mondo joma lando Injili oyud konyruok duto mag ngimagi koa kuom Injili ma giyalo.

¹⁵An to pok akonyora gi ratiro mawangogi kata achiel, kendo kata sani ok andiknu baruani mondo akwau kony monego ayudi koa kuomu. Diberna ka atho molyo ka ayiene ng'ato oketho sun-ganani: ¹⁶Kata kamano, ka ayalo Injili to ok onego asungra, nikech ochuna ni nyaka ayal. Mano kaka dibed malitna kaok ayalo Injili ! ¹⁷Ka ayalo kuom dwardona to ayudo mich, to ka ok kuom dwardona to mano nyiso ni achopo ote mano mane omiya. ¹⁸To kara michna en ang'o? En ma, ni mondo ayal Injili

maonge msara, mondo kik akonyra gi ratiro maga e tij yalo Injili.

¹⁹Nikech kata obedo ni an thuolo kendo ok an misumba ng'ato, to aselokora misumba ji duto mondo eka alok ji mang'eny kuomgi. ²⁰Ka atiyo e dier jo-Yahudi, to adoko machal kodgi mondo alokgi. Ka atiyo e dier joma luwo chik, to achalo ng'ama luwo chik (Kata obedo ni an awuon ok an e bwo chik), mondo eka alok joma luwo chik. ²¹Ka atiyo e dier joma onge chik, ne adoko machal kodgi, (Kata obedo ni chik Nyasaye ok oweya oko nikech an e bwo chik Kristo), mondo eka alok Jo-ma onge chik. ²²Joma nyap ne adokonigi manyap mondo eka alokgi. Asetimora gimoro amora ni ji duto mondo atem reso moko kuomgi e yomoro amora manyalore. ²³Magi duto atimo nikech wach Injili, mondo an bende ayud gwech kuom Injili nogo.

²⁴Donge ung'eyo ni e piem mar ng'wech jong'wech duto ringo, to ng'ato achiel kende ema yudo mich? Omiyo ringuru, e yoo madimi uyud mich. ²⁵Jang'wech ka jang'wech madhi e piem ritore e yore duto. Gitimo kamano mondo giyud osimbo ma ok siki; wanto waritore mondo wayud osimbo mabiro siko nyaka chieng'. ²⁶Emomiyo an ok aringi ka ng'ama okia kuma itieke ng'wech, bende ok ago ngum ka gima agoyo yamo nono. ²⁷Ooyo, aboyo ringra gi goch mondo owinj wachna, mondo kik yud ni an awuon ok ayudo osimb loch, bang' yalo ni ji mamoko.

Siem Miyudo E Sigand Israel

10 Jowetena, ok adwar ni mondo ukia kaka kwerewa nowuotho e bwo bor polo to kendo giduto ne ging'ado Nam. ²Ne giyudo batiso mar Musa gi duto e bor polo kendo ei Nam. ³Kendo giduto ne gichamo chiemb chuny machalre ⁴Bende giduto ne gimadho math mar chuny ma chalre. Nikech ne gimetho koa e lwanda mar chuny mane luwo gi; to lwandano ne en Kristo. ⁵To kata kamano,

Nyasaye ne ok mor kod thothgi, kendo ringregi motho nodong' e thim.

⁶Gigi duto notimore mondo obednwa ranyisi masiemowa mondo kik wagomb gik maricho kaka ne gigombo, ⁷Kik ulam nyiseche manono kaka moko kuomgi notimo, mana kaka ondiki ni, "Ji nobet piny mondo ochiem kendo omethi, kendo ne gia malo mondo gimiel." ⁸Kik watterre kaka moko kuomgi notimo, mi ji alufu piero oriyo gadek kuomgi notho odiechieng' achiel. ⁹Kik watem Ruoth, kaka moko kuomgi notimo, mi thuonde nonegogi. ¹⁰Bende kik wang'ur, kaka moko kuomgi notimo, mi malaika mar tho nonegogi.

¹¹Gigi duto notimore nigi kaka ranyisi ni joma moko, kendo nondiknwa gi mondo gibednwa siem: wan mwadak e ndalo ma giko piny chiegnini. ¹²Omiyo, ka iparo ni ichun'g motegno to bed motang; nono to ipodho! ¹³Onge tem museneno mopogore gi ma ji duto neno. Nyasaye rito singruokne, ok obi yie mondo otemu mohingok tekreu. To esama itemoueno, obiro miyou yo munyalo tonygo mondo ubed gi teko mar timo sinani.

Nyasi Mag Nyiseche Manono Kod Sawo Mar Ruoth.

¹⁴Kuom mano, osiepena mageno ringuru ua kuom nyiseche manono. ¹⁵Awuoyo kodu kaka joma parogi nikare omiyo paruru matut tiend wach ma awachonuno. ¹⁶Donge okombe mar gwech mwagoye erokamano ketowa e lalruok achiel e remb Kristo? Koso makati ma wang'injo donge ketowa e lalruok achiel, e ringre Kristo? ¹⁷Nikech nitie makati achiel, koro wan ringruok achiel, kata obedo ni wang'eny, nikech wan duto wachamo makati achielno.

¹⁸Ka wakawo jo Israel kaka ranyisi: Donge joma chamo gii misango bet e lalruok achiel gi kendo mar misango? ¹⁹Diponi awacho ni misango mochiwne nyiseche manono en gimoro kata ni nyasaye manono nigi tiende? ²⁰Ooyo!

Awacho ni misango ma joma kia Nyasaye timo, gitimo ni jochiende, to ok ni Nyasaye. To ok adwar mondo ubedi e lalruok achiel gi jochiende ²¹Ok unyal madho kikombe Ruoth kaachiel gi kikombe jochiende bende; ok unyal chiemo e mesa Ruoth ka uchiemo e mesa jochiende bende. ²²Koso watemo nyiego mar Ruoth? Waparoni watek molye?

Thuolo Mar Joma Oyie

²³"Wan thuolo timo gimoro amora mwahero" to ng'euo ni gik moko duto mwatimo ok kelnwa konyruok. "Wan thuolo timo gimoro amora", to gik moko duto ok kelnwa dongruok ²⁴Kik ng'ato dwar mana gik makonye en owuon, to ng'ato mondo odwar gima konyo jowadgi

²⁵Un thuolo mar chamo ring'o mong'iew e chiro maok ubedo gi penjo mathoth e chunyu ²⁶nikech, "Piny kaachiel, gi gik moko duto manie iye, gin mag Ruoth." ²⁷Ka japiny mokia Nyasaye ogweli e chiemo, midwaro dhiye, to cham gimoro amora moketi e nyimi maok ichich gi penjo mathoth e chunyi. ²⁸To ka ng'ato onyisi ni, "Chiemoni ne olosi mondo otingo misango ne nyiseche manono, "to kik icham chiemono, nikech wach ng'at monyisi wachno, kendo nikech wach chich. ²⁹Tim kamano mar konyo chunyu jagono to ok nikech konyruokni. Ang'o ma dimi thuolo mara ding'ad ne bura nikech chich mar ng'ama chielo. ³⁰Ka achamo chiemo gi erokaman, to ang'o momiyo ikwana ka jaketho ne gima agoyonee Nyasaye erokamano?

³¹Omiya, gimoro amora mutimo, bed ni uchiemo kata umetho, to timgiuru duto mondo Nyasaye oyud duong' ³²Kik ubed rachwany ni jo -Yahudi kata Ogendini kata ni jo-kanisa Nyasaye, ³³mana kaka an awuon atemo moro ji duto e gik moko duto matimo, ka ok amany mana gik makonya an awuon, to atimo gik makonyo ji mangeny, mondo kanyalore to giyud warruok.

11 Luwuru kit ngimana, mana kaka an bende aluwo kit ngima Kristo.

Gik Madwarore E Lemo

²Apwoyou nikech usiko upara e yore duto, kendo nikech umako puonj duto mana kaka amiyou.

³To adwaro mondo ung'e ni Kristo e wi dichwo ka dichwo, kendo ni dichwo ewi dhako, kendo ni Nyasaye e wi Kristo.

⁴Kuom mano dichwo malemo kata makoro e chokruok koumo wiye ochayo Kristo.

⁵Kamano bende dhako malemo kata makoro e chokruok, ka ok otweyo kitamba okuodo wi chwore (ongge pogruok e kinde gi dhako moliel yie wiye). ⁶Ka dhako ok dwar tweyo kitamba to kata ber oliel yie wiye. To kaka en wichkuot ka dhako olieli yie wiye mapoth to ber otwe kitamba. ⁷Dichwo to ok owinjore oum wiye nikech en e kit Nyasaye gi duong'ne; dhako to en duong' mar dichwo. ⁸Dichwo ne ok oa kuom dhako to dhako emane oa kuom dichwo. ⁹To bende dichwo ne ok ochwe ne dhako to dhako ema ne ochwe ne dichwo. ¹⁰Nikech wachni kendo nikech malaikie, dhako mondo oum wiye kaka ranyisi ni en e bwo loch.

¹¹Kata kamano, kuom Ruoth, dhako ok nyal dak maonge dichwo mana kaka dichwo bende ok nyal dak maonge dhako.

¹²Nimar, mana kaka dhako nochwe koa kuom dichwo, e kaka dichwo bende inywolo gi dhako, to gik moko duto aa kuom Nyasaye. ¹³Penjreuru un uwegi ni: Bende en gima kare mondo dhako olam Nyasaye ka wiye ninono? ¹⁴Donge kit chwech puonjou ni yie wich maboyo en wichkuot ni dichwo? ¹⁵To ka ng'ama dhako yie wiye boyo to en duong' mare, nikech yie wich maboyo omiye kaka raum. ¹⁶Ka ng'ato kuomu dwaro kwedo maa, to ong'e ni waongegi tim mopogore gi mwapuonjoni, kendo kata kanise duto mag Nyasaye ongego.

Sawo Mar Ruoth

¹⁷Puonj makoro amiyou sani to ok

anyal pakoue, nikech kinde duto ma uchokoru kaachiel to chokruoku kelo mana rach kar kelo ber. ¹⁸Mokuongo awinjo ni ka uchokoru kaachiel kaka kanisa, to nitie pogruok e kindu, kendo anyalo yie ni wachno en adier. ¹⁹Kare emomiyo nitiere pogruok e kindu mondo joma Nyasaye oyiego ong'ere maler. ²⁰Ka uchokoru kanyakla to nenore ni ok ucham Sap Ruoth; ²¹nikech ka uchiemo to ng'ato ka ng'ato rikni gi chamo chiembe owuon, ma ok orito Jowetene. Kuom mano, ng'ato denyo, to ng'at machielo to mer. ²²Donge un gi miechu munyalo chiemoe kendo methoe? Koso uchayo kanisa Nyasaye, momiyo ukuodo wi joma ochando? Dawachnu ang'o? Uparo ni dapaku kuom wachni? Ok kamano ngang!

²³Nikech puonj mane ayudo kuom Ruoth mi amiyou en ma: Ni Ruoth Yesu nokawo makati e otienonogo mane ond-hogee, ²⁴kendo bang' goyo erokamano nong'inje, kowacho ni, "ma en ringra mochiwnu. Timuru ma ka uparago." ²⁵Kamano bende nokawo kikombe bang' chiemo, mi owacho ni, "Kikombeni en singruok manyien motim gi remba; timuru ma, kinde duto mumadhee, mondo uparago." ²⁶Nikech ka usiko uchamo makatini kendo umadho kikombeni, to unyiso tho mar Ruoth nyaka chieng' ma enoduogie.

²⁷Emomiyo ng'ama ochamo makatini kata ometho e kikombeni e yo maok owinjore, bura biro loyo kodoko jaketho kuom ringre Ruoth gi rembe. ²⁸ng'ato ka ng'ato nyaka nonre mokuongo, kapok ochamo makati kata ometho e kilombe. ²⁹Nikech ng'ato ang'ata mochiemo kendo ometho, ma ok odewo ringre Ruoth, kelo bura kuome owuon. ³⁰Mano emomiyo ji mathoth kuomu ool kendo tuo; kendo moko kuomu osetho. ³¹To kadewanonore wawegi mokuongo, to bura ok dilowa. ³²To ka Ruoth ng'adonwa bura to orieyowa mondo kik bura lowa gi jopiny.

³³Kuom mano, Jowetena, ka uchokoru kaachiel mondo uchiem, to ng'ato ka ng'ato mondo orit nyawadgi. ³⁴To ka ng'ato

odenyo, to ber mondo ochiem dala, mondo kik chokruok ma ubedogo kelnu kum.

Weche mamoko nalos kodu ka abiro.

Mich Mag Roho

12 Jowetena, daher mondo ung'e adiera kuom mich mag Roho mondo kik ubed maonge ng'eyo. ²Ng'eyo ni kane pod un jopiny, mokia Nyasaye nechalo ne oywau gi nyiseche manono maok wuo mi ulal. ³Omiyo, adwaro mondo ung'eni ng'ama Roho mar Nyasaye otelone ok nyal wacho ni, "Okuong' Yesu", to bende onge ng'ama nyalo wacho ni, "Yesu en Ruoth", ka Roho maler ok otelone.

⁴Nitie mich mag Roho mopogore, to Roho achiel ema chiwogi. ⁵Nitie tije mopogore opogore, to Ruoth en achiel. ⁶Nitie yore mathoth mitiyogo tich to Nyasaye achiel ema chiwone ng'ato ka ng'ato teko mar tiyogi.

⁷Roho nyisore e ngima ng'ato ka ng'ato e yo mopogore opogore, mondo okel konyruok ni ji duto. ⁸Ng'at moro Roho omiyo nyalo mar wuoyo gi rieke, ng'at machielo Rohonogo omiyo tiend ng'eyo matut. ⁹ng'ato Rohonogo miyo yie, to ng'at machielo omiyo mich mar chang'o ji; ¹⁰Ng'at moro omiyo teko mar timo honni, moro omiyo teko mar hulo weche moa kuom Nyasaye, moro omiyo rieke mar fwenyo maling' ling' mag chunje mopogore opogore, moro omiyo nyalo mar wuoyo gi dhok mayore, eka ng'at moro to omiyo mich mar loko dhok mayore. ¹¹Magi duto gin tij Roho achiel kendo ma chalre, kendo ochiwogi ni ng'ato ka ng'ato kaka ohero.

Ringruok Achiel Gi Fuonde Mang'eny

¹²Kata obedo ni ringre dhano en achiel to en gi fuonde mathoth, to bende kata obedo ni en gi fuonde mathoh pod en mana ringruok achiel. Ma e kaka Kristo bende obedo. ¹³Kamano bende e kaka wan duto, bed ni wan jo-Yahudi kata jo-Grik,

kata wasumbini, kata joma nithuolo, nobatiswa kuom Roho achielnogo mi wadoko ringruok achiel, kendo osemiwa Roho achielno mondo wamodhi waduto.

¹⁴Nikech ringruok ok olos gi fuon achiel, to olose gi fuonde mang'eny. ¹⁵Ka tielo nyalo wacho ni, "Kaka ok an lwedo, ok an achiel kuom fuonde ringruok," to mano ok nyal mone bedo achiel kuom fuonde ringruok. ¹⁶Kata, ka it nyalo wacho ni, "Kaka ok an wang' ok an achiel kuom fuonde ringruok," to mano ok nyal mone bedo achiel kuom fuonde ringruok. ¹⁷Da bed ni ringruok duto en mana wang' kende, downj wach nadi? Kata ka da ringruok duto bed mana it kende, dwang'wech nadi? ¹⁸To kata kamano, Nyasaye noketo fuon ka fuon e ringruok mana kaka nodwaro ni mondo gibedi. ¹⁹Kane bed ni gin fuon achiel to ringruok dibed nadi? ²⁰E kaka ubedo ni nitie fuonde mang'eny, to ringruok en achiel.

²¹Kuom mano wang' ok nyal wachone lwedo ni, "Ok adwari!" kata wich bende ok nyal wachone tielo ni, "Ok adwari." ²²To adier en ni ok wanyal bedo maonge gi fuonde ringruok manenorenwa ni nyap. ²³Fuonde matindo wamiyo rit mamalo molooyo, kendo fuonde ma wakawo ni richo warwako maber molooyo. ²⁴Fuonde mabeyo molooyo to ok dwar rit ma kamano. Nyasaye owuon oseriwo fuonde mopogore opogore moloso ringruok, kendo osemiyo fuonde mwachayo duong' ²⁵mondo kik winjuok bed maonge e ringruok; to mondo fuon ka fuon orit nyawadgi kaka dwarore. ²⁶Ka fuon achiel mar ringruok winjo lit, to fuonde ringruok mamoko duto winjo kode; ka fuon moro yudo pak, to mamoko duto bedo mamor kaachiel kode.

²⁷E kaka un duto un ringre Kristo, kendo ng'ato ka ng'ato kuomu en fuond ringruokno. ²⁸To ei kanisa, Nyasaye oseketo ji man gi mich mopogore opogore e tichne: Mokwongo, jooto, mar ariyo jokor wach to mar adek jopuonj, eka joma timo honni, ka aye to joma omi teko mar chango joma tuo,

kod jokony ji, kod jochik tich, to mogik, joma wuoyo gi dhok mayoreyore. ²⁹Be ji duto gin jooto? Be ji duto jokoro? Be ji duto gin jopuonj? Be ji duto timo honni? ³⁰Be ji duto nigimich mar chango joma tuo? Be ji duto wuoyo gi dhok mayore? Be ji duto jolok dhok mayore yore midhumo? ³¹Owinjore uket chunyu kuom mich madongo.

Hera

Koro abiro nyisou yoo maberie molooyo.

13 Kata bed ni awuoyo gi dho dhano, kata gi dho malaike, to aonge hera to achalo mana ongeng'o maywak kata olang' migoyo. ²Ka an gi mich mar koro, kendo ka ang'eyo tiend weche matek duto modhiero ji ng'eyo, kendo an gi riekto duto kata ka an gi yie maduon' manyalo golo godekuonde magin tie, - to ka aonge hera to ok an gimoro. ³Kata bed ni achiwo giga duto ma an-go ne jodhier, mi achiw ringra mondo owang' - to ka aonge hera to onge ohala mayudo.

⁴Hera timo kinda to bende ong'won. Oonge nyiego gi gir ng'ato, kendo ok osungre kata opakre. ⁵Wiye ok tek, bende ok odwar gik makonye en kende, iye ok wang' piyo kendo ok okan gik maricho motimne. ⁶Hera ok mor gi gik maricho, to omor gi adiera. ⁷Hera umo weche duto, osiko oyie ayieya, osiko ogeno agena, kendo osiko odhil adhila

⁸Hera ok rum. To kama nitiere weche mikoro, weche mikoro norum; kama nitiere wuoyo gi dhok mayoreyore, dhok mayoreyore norum; kama nitiere ng'eyo; ng'eyo bende nokadhi. ⁹E thuoloni weche mwang'eyotin to bende wakoro bath wach ma mago mabiro chopo kare tin, ¹⁰to ka weche duto nochop kare to mago morem nogiki. ¹¹Kane an nyathi, naloso ka nyathi, ne aparo ka nyathi, kendo nanano ka nyathi, to kaka koro an ng'ama duong', yore mag nyithindo aseweyo katoka. ¹²Gima waneno sani chal mana gi kido matiptip mineno e rang'i, to chieng'ono wananene wang' gi wang'. Gima ang'eyo sani en mana bath adiera, to chieng'no

anang'e malong'o chuth, mana kaka ong'eya chuth.

¹³To nitie gik moko adek mosiko, ma gin: yie, geno, kod hera, to maduong' molooyo kuomgi en hera.

Mich Mag Koro Wach Kod Wuoyo Gi Dhok Mayoreyore.

14 Luwuru hera, kendo dwaruru mondo ubed gi mich mag chuny, to molooyo mondo ubed johul wach. ²Nikech ng'at ma wuoyo gi dhok mayore ok wuo gi ji, to owuoyo gi Nyasaye, nikech onge ng'ama winjo tiend gima owacho. Owacho weche mopondo modhiero ng'eyo gi teko mar Roho. ³To ng'at ma hulo wach, loso gi ji mondo ogergi, ojiw-gi kendo ohoogi. ⁴Ng'at ma wuoyo gi dhok ma yoreyore gerore kende owuon, to ng'at ma hulo wach moa kuom Nyasaye gero kanisa duto. ⁵Daher mondo uwuo gi dhok mayore yore uduto, to molooyo mano, ni mondo uhul wach. Ng'at ma hulo wach duong' molooyo ng'at ma wuoyo gi dhok mayoreyore makmana ka nitie ng'at manyalo loko tiend wach modhumono, mondo kanisa duto oyud konyruok.

⁶Paruru ane, Jowetena, uparo ni ka abiro iru mit awuoyonu gi dhok mayore, en konyruok mane ma duyudi, ka ok akelonu fveny moro kata ng'eyo, kata wach mihulo kata puonji? ⁷Kata mana gik maonge ngima kuomgi magoyo thum, kaka asili kata nyatiti ding'e ywakgi nadi ka ok ipogo dwondgi? ⁸To bende, ka turumbete ogo gi duol mong'ere, ng'ama diikre ni lweny? ⁹Chal kamano kuomu bende: Ka ok ukonyoru gi weche maliw ma ji duto winjo to ng'ama biro ng'eyo tiend gima uwacho? Wecheu biro lal nono mana e yamo! ¹⁰Ong'ere ni nitie duol mopogore opogore e piny, to onge kata achiel kuomgi maonge gi tiendgi. ¹¹To ka ok apogo duond ng'ato to adokone jamwa, kendo en bende odokona jamwa. ¹²Emomiyo un bende kaka udwaro mondo ubed gi mich mag Roho, temuru matek molooyo mondo unwang' mich

mago magero kanisa.

¹³Kuom mano, ng'at ma wuoyo gi dhok moro amora ma ji okia olem mondo obed gi nyalo mar loko tiend gik mowacho. ¹⁴Nikech ka alamo gi dhok mayoreyore to chunya ema alamogo to pacha ok ti. ¹⁵To koro kara atim ang'o? Abiro lamo gi chunya, to bende abiro lamo gi pacha, abiro wer gi chunya, to bende abiro wer gi pacha. ¹⁶Ka upako Nyasaye gi chunyu, to ere kaka ng'ato manie dieru maok winji dhougho digo ni, "Amin" ne erokamano mugoyo, nikech okia gima uwacho? ¹⁷Nyalo bet ni igoyo erokamano maber chuth, to ng'at machielo ok gerre.

¹⁸Adwokone Nyasaye erokamano nikech awuoyo gi dhok mayoreyore molooyo un duto. ¹⁹To ei kanisa to daher wacho weche kata abich kende gi dhok ma ji winjo mondo apuonj molooyo weche alufu apar gi dhok mayoreyore ma ji ok winji.

²⁰Jowetena, kik ubed nyithindo e pachu, to chaluru nyithindo mayom mana kuom gima rach kende, to e pachu beduru joma dongo. ²¹Ondiki e kitap chik ni,

"Anakonyra gi joma wacho dhok mayoreyore kendo gi dho joma welo, abiro wuoyo gi jogi to kata kamano ok giniwin-ja," Ruoth Owacho.

²²Kuom mano mich mar wuoyo gi dhok mayoreyore en ranyisi miywayogo joma pok oyie, to ok joma oseyye. Mich mar hulo wach to en mar joma oseyye ok joma pok oyie. ²³Omiyo ka kanisa duto ochokore kaachiel, to ji duto wuoyo gi dhok mayoreyore to ka nitie jomoko maok winj dhogino, kata ka joma ok oyie moko odonjo e chokruogno, donge digiwach ni wiu okethore? ²⁴To ka ng'at maok oyie, kata ng'at moro ma jaoko moro odonjo e chokruoku, to oyudo ka ji duto hulo wach, weche mowinjo nyalo loye gi bura, mi olokre, ²⁵kendo paro maling'ling' mopondo e chunye elore e lela, enopodh auma kolamo Nyasaye, kowacho "Yawa, Nyasaye nie dieru ka adier!"

Chenro Mar Lemo E Kanisa

²⁶Jowetena, koro dwawach ang'o? Ka uchokoru e lemo to yudore ni ng'at moro nigi wer, to ng'at machielo nigi puonj, to moro nigi fweny, to machielo dwaro dhum gi dhok mayoreyore kata loko tiend wach midhumono. To gigi duto nyaka tim e yo mochanore kendo ma diger kanisa ²⁷Ka nitie joma dhum gi dhok mayoreyore to ji ariyo kata adek ka ng'eny kende ema mondo owuo to mana e yo mochanore maber, ka moro ka moro loso bang', wadgi, kendo ng'ato nyaka lok tiend weche ma gidhumo. ²⁸To ka onge ng'ato manyalo loko tiend wehego, to ng'at madhum gi dhok mayoreyore mondo oling' e kanisa. Wuoyo to owuo mana gi Nyasaye e chunye maiye.

²⁹Joma hulo wach kik kadh ariyo kata adek, kendo ka giwuoyo to ji mamoko onon mos ka bende weche magiwacho owinjore. ³⁰To ka ng'ato moro manie chokruokno omi wach moro mopondo mondo owachi, ng'at mane oyudo dhi nyime gi loso nyaka ling' mondi, eka owuo. ³¹Nikech un duto unyalo hulo wach, ka ng'ato ka ng'ato koro bang' nyawadgi, mondo ji duto oyud puonj kod jip. ³²Jahul wach nigi nyalo mar geng'o wach mabirone, ³³nikech Nyasaye ok en Nyasach loko, to En Nyasach kuwe.

To mana kaka timore ei kanyakla mar joma oyie duto, ³⁴joma mon onego oling' e kanise. Ok oyienigi loso, nyaka giwinj wach ka giling' kaka chik owacho. ³⁵Ka gidwaro mondo olernigi tiend wach moro, to gipenj chwogi giwegi dala, nikech en wichkuot ka ng'ama dhako wuoyo e kanisa. ³⁶Mit kuparo ni un emane wach Nyasaye ochakore kuomu? Koso ugalo ni un kendu ema wach osechoponu?

³⁷Ka ng'ato okawore ni en jahul wach kata ni en ng'at chuny, to nyaka oyie ni wach mandikonuni en chik Ruoth. ³⁸Ka ng'ato ok orwako puonjnani to en bende ok norwake.

³⁹Kuom mano, Jowetena, gomburu

bedo johul wach, to kik utam ji dhum gi dhok mayoreyore. ⁴⁰Timuru gik moko duto e yo mowinjore kendo mochanore.

Chier Mar Kristo

15 Koro Jowetena, adwaro paronu wach Injili mane ayalonu, mi urwako kendo koro uchungoe motegno. ²Injilini ema kelonu warruok, ka umako matek wach mane ayalonu mokwongo. Ka ok kamano to kara ne uyie kayiem nono.

³Nikech puonj maduon' mogik mane ayudo kuom Ruoth mi amiyon en ma: ni Kristo notho nikech richowa kaluwore gi Ndiko, ⁴kendo ni ne oyike, kendo ni ne ochiere oa kuom joma otho chieng' mar adek kaluwore gi Ndiko, ⁵kendo ni ne ofwenyore mokwongo ni Petro, eka bang' e nofwenyore ni joote apar gariyo. ⁶Bang' mano nofwenyore ni Jowete molojo mia abich, ka gin kanyachiel, kendo thothgi pod ngima nyaka sani, kata obedo ni moko osenindo. ⁷Achien nofwenyore ni Jakob; bang' e nofwenyore ni Joote duto, ⁸eka achien mogik, nine ofwenyore ni an bende, kata obedoni achal gi ng'at mane onyuol bogno.

⁹Nikech an e jaote matinie mogik to bende ok awinjora mondo oluonga ni jaote, nikech ne asando kanisa Nyasaye. ¹⁰To koro, kuom ng'wono mar Nyasaye, an gima an, kendo ng'wono mane omiya ne ok orem mak ochopo tichne. Kar bedo kamano to asetiyon matek molojo joote mamoko duto, to ok asetimo mago duto gi tekra awuon, to kuom ng'wono mar Nyasaye matiyo koda. ¹¹Omiyo kata bed ni an ema ne ayalonu Injili kata gin emane giyalonu, to ma e gima wayalo kendo ma e gima neuketoe yieu.

Chier Mar Joma Otho

¹²To ka iyalo ni Kristo osechier oa kuom joma otho, to ang'o momiyo jomoko kuomu wacho ni joma otho ok bi chier? ¹³Ka en adier ni joma otho ok chier to mano nyiso ni kata Kristo bende pok ochier. ¹⁴To ka Kristo pok ochier to wayalo

kayiem, kendo yie maru bende onge tiende. ¹⁵To molooyo mano, wadoko joneno mariambo kuom Nyasaye nikech wasebedo ka wanyiso ji ni Nyasaye ema osechiero Kristo oa kuom joma otho. To kara ne ok ochiere ka en adier ni joma otho ok chier. ¹⁶Nikech ka joma otho ok chier to kata Kristo bende pok ochier. ¹⁷To ka Kristo pok ochier, to yie maru en nono; kendo pod ulal alala e richou. ¹⁸Mano nyiso bende ni jo Kristo mos-enindo bende olal. ¹⁹Ka genowa kuom Kristo nigiti tiende mana e ngimani kende, to wan joma odhierie molooyo ji duto.

²⁰To adiera en ni Kristo osechier oa kuom joma otho. Chierneno en kaka gir singo manyiso ni joma onindo e liel bende ibiro chiero. ²¹Nikech kaka tho noa kuom ng'at achiel e kaka chier mar joma otho bende osebiro koa kuom ng'at achiel. ²²Nikech mana kaka ji duto tho nikech Adam, ji duto nobed mangima nikech Kristo. ²³To gigi nyaka timre e yo mochanore: Kristo ema kwongo chier kaka olemo mokwongo chiek, eka bang'e joma ni kuome bende nochier chieng' ma enobi. ²⁴Eka giko nochopi, mi Kristo nolo joloch duto, nolo teko duto kendo nolo nyalo duto, eka nodwok pinyruoth ni Nyasaye Wuoro. ²⁵Nikech Kristo nyaka bed gi loch nyaka chop Nyasaye lo wasigu duto, mi oketgi e bwo pat tiende. ²⁶Jasigu manotieki achien mogik en tho. ²⁷Nikech Ndiko wacho ni, "Nyasaye, oseketo gik moko duto e bwo tiende". To ka ndiko wuoyo kuom "gik moko duto", to ong'ere ni mano ok oriwo Nyasaye owuon nikech Nyasaye ema keto gik moko duto e bwo loch Kristo. ²⁸To ka gik moko duto oseketi e bwo loch Kristo, eka Wuowi owuon noketi e bwo loch Nyasaye, ma bende noketo gik moko duto e bwoye eka Nyasaye nobed gi loch ewi gik moko duto

²⁹To ka poni chier onge, to ere tiende batiso ji ewi joma osetho? Ka joma otho ok chier, to ibatiso ji e wigi nang'o? ³⁰To kata mana wan, ang'o ma dimi wachom masira seche duto? ³¹Jowetena, kaka un e

sungana kuom Yesu Kristo Ruodhwa awachonu ka aramo, ni tho ochoma pile! ³²Ka dipo ni ne akedo gi le makwinye e dala Efeso mana nikech dwach dhano to ohala mane ma ayudo? Ka joma otho ok chier to kara

"Wadhi adhiya nyime gi chiemo kendo gi metho, nikech kiny wanatho."

³³Kik ng'ato wuondu, " Bedo e lalruok kod joma richo ketho timbe mabeyo." ³⁴Duoguru e pachu maliw, daguru ngima makare kendo weuru timo richo, nikech nitie jomoko kuomu mokia Nyasaye. Awacho kamano mondo akuodgo wiu.

Ringruok Mochier

³⁵To ng'ato nyalo penjo ni, "Joma otho ichiero nadi? Ginibed gi ringruok machalo nadi?" ³⁶To mano penjo mofuwu mandadi! Ka ukomo kodhi to nyaka okwong otho eka bang'e otwi. ³⁷Ka ukomo, to ukomo mana kodhi kende. Onyalo bedo koth ngano kata koth gimachiolo. ³⁸To Nyasaye miye kido mana kaka en ema osechano, kendo kodhi ka kodhi omiyo kite owuon. ³⁹Ringruok duto ok chaire: Dhano nigiti kit ringruok mamargi, le nigiti machiolo, winy nigiti machiolo, kendo rech bende nigiti machiolo. ⁴⁰Nitie bende chwech mag polo gi chwech mag piny, kendo kit duong mar chwech mag polo opogore gi kit duong' mar chwech mag piny. ⁴¹Wang' chieng' nigiti kit ler ma mare owuon, to dwe be nigiti machiolo, kendo sulwe bende nigiti mare. Sulwe ka sulwe chiwo ler mopogore gi nyawadgi.

⁴²Kamano bende e kaka chier mar joma otho biro chalo. Ringruok ma iyiko en gimataw, to ichiere ka en gima ok tow. ⁴³Ka iyike to oonge gi duong' to ichiere ka en gi duong, to bende iyike ka oonge teko, to ichiere ka en gi teko, ⁴⁴kendo iyike kaka ringruok mar pinyini, to ichiere kaka ringruok mar polo.

Ka nitiere ringruok mar piny to nitiere bende ringruok mar polo. ⁴⁵Emomiyo

ondiki ni, "Adam maen dhano mokuongo, nodoko gima ngima" to Adam mogik nodoko chuny machiwo ngima. ⁴⁶To mano mar chuny ok ema kuongi, to mar ringruok ema kuongo, eka bang'e mar chuny. ⁴⁷Dhano mokuongo nochwe gi lop piny, to dhano mar ariyo noa e polo. ⁴⁸Jal mane ochwe gi lowo ema ji duto oa kuome, to kamano bende jopolo duto oa kuom Jal mane oa e polo. ⁴⁹Mana kaka warwakore gi kit dhand lowo e kaka wabiro rwakore gi kit dhand polo.

⁵⁰Jowetena, tiend gima awacho en ma: Ringruok gi remo ok nyal chamo girkeni mar pinyruodh Nyasaye kendo gima tow ok nyal rwakore gi gima ok tow, ⁵¹Winjuru anena midhieroni: Ok wanatho waduto to nolokwa wan duto kadiemo wang' ⁵²apoya nono, kadiemo wang' ka tung' mogik noywagi. Nikech ka tung' noywagi to jomane osetho nochier gi ringruok maok tow to wan nolokwa. ⁵³Nikech ringruok matow nyaka ruakre gi gima ok tow, kendo ringruok mathoni nyaka ruakre gi gima ok tho. ⁵⁴Eka bang'e ka ringruok matop oserwakore gi mano ma ok tow, kendo mano matho oserwakore gi mano ma ok tho, eka wach mondiki nochop kare, ni, " Tho oselo motiek chuth."

⁵⁵"In tho, koro ere lochni? In tho, lit mikelo ni kanye?"

⁵⁶Lit mar tho en richo, to teko mar richo en chik ⁵⁷To Nyasaye mondo opaki, nikech osemiyowa loch kuom Ruodhwa Yesu Kristo!

⁵⁸Emomiyo, Jowetena mageno, chun-guru motegno. Kik uyie gimoro oyiengu. Chiwreuru chuth kinde duto ni tich Ruoth, nikech ung'eyo ni tich mutiyo matek ni Ruoth ok obedo kayiem nono.

Chiwo Michoko Ni Jo Nyasaye

16 Koro kuom wach choko chiwo ni jo-Nyasaye: Timuru gima ne akone jo-kanisa ma Galatia mondo otim. ²ng'ato ka ng'ato kuomu nyaka ket mich

moko tenge Juma Pil ka Juma Pil, kaluwore gi yuto mare mondo ka abiro to onge mich mibiro chok kendo. ³Ka achopo, to anaor joma upwodho, gi barupe manyiso chalgi mondo giter michugo Jerusalem. ⁴Ka ber mondo an bende adhi, to ginidhi koda.

Kwayo Mag Paulo Owuon

⁵Abiro biro iru bang' kadho Makedonia, nikech abiro luwo kuno. ⁶Samoro anyalo bedo kodu kuom ndalo mogwarore to samoro anyalo tieko mana ndalo koyo duto, mondo ukonya e wuodha kamoro amora ma abiro dhiye. ⁷Ok adwar mondo aneu mana ayuka ka akadho, to ageno mar bedo kodu aming'a, ka Ruoth oyie. ⁸To pod abiro dak Efeso ka nyaka chieng' Pentekost, ⁹nikech dhoot oyaworena malach mar tiyo tich manyago olemo to wasigu makedo koda bende ng'eny.

¹⁰Ka Timotheo obiro iru, neuru ni onge gima oluoro ka en e dieru, nikech otiyo ne Ruoth, mana kaka an. ¹¹Kuom mano, kik ng'ato ang'ato otamre maok orwake to konyeuru mondo odhi nyime e wuodhe gi kuwe, mondo oyud yo mar duogo ira nikech arite en kaachiel gi Jowete mamoko.

¹²Koro kuom owadwa Apolo. Ne ajiwe matek mondo olimu kod Jowete mamoko, to pok oyie chuth ni onego obi iru sani ka oyudo thuolo to obiro biro achien.

¹³Ritreuru, kendo chunguru motegno e yie maru, beduru jochir kendo beduru motegno. ¹⁴Timuru gik moko duto gi hera.

¹⁵Ung'eyo ni jood Stefano e joma nokwongo yie kuom Kristo e piny Akaya, kendo gisechiwore mar tiyo ni jo Maler. Ajiwou, Jowetena, ¹⁶mondo uyie bet e bwo joma kamago, kendo ebwo jomatiyo kaachiel kodgi. ¹⁷Ne adoko mamor kane Stefano, gi Fortunato kod Akaiko ne jobiro ira, nikech ne gichopona rem mane onego uchopi tone ok uchopo. ¹⁸Ne gikonyo chunya, kaachiel gi maru bende. Joma kamago onego omi duong'

Mos Mogik

¹⁹Kanise manie gweng' mar Asia ooronu mos. Akula gi Priska, kaachiel gi kanisa machokore e odgi, jomosou gimor kuom Ruoth. ²⁰Jowete duto man ka ooronu mos. Mosreuru duto ng'ato gi ng'ato gi yogruok maler.

²¹An Paulo awuon ema andikonu mosni gi lweta awuon.

²²Ka ng'ato ok ohero Ruoth to mondo okuong'e! Bi, Yaye Ruoth.

²³Ng'wono mar Ruoth Yesu obed kodu.

²⁴Herana obed kodu un duto ei Kristo Yesu. Amin.